

Segun minister Arthur Dowers

Locual ta pasando na KIA tin di haber cu falta di comunicacion

ORANJESATD - Na KIA no ta un secreto cu tin malcontento meymey di e trahadonan na KIA. Esaki tin di haber cu e maneho di e directora nobo. Tin menasa continuo pa welga na KIA y na diferente ocasion a purba na calma tur situacion cu tin. E minister encarga cu e facilidad, cual ta Arthur Dowers a splica cu e por saca su conclusion basa riba tur loke e ta tende. Asina mes a instala un comision pa asina atende cu e situacion.

E sindicatonan lo wordo informa y ta aprecia e cooperacion cu a haya di tur hende. E mandatario a bisa cu locual ta pasando na e institucion no ta algo grave y mas bien ta algo cu tin di haber cu comunicacion segun minister Dowers.

Den pasado

For di momento cu KIA a existi tabata tin problema na e organisacion. Mester crea hende den e organisacion

pa maneha e luga. Awendia ta trahando den un edificio deficiente pasobra e ta mal traha. Ta dificil pa maneha e fluho di cantidad di hende cu tin eyden cu actividadnan drechi y no ta un situacion facil pa deal cu ne. Ta un situacion di comunicacion di ser humano pa ser humano y cu tambe tin di haber cu falta di hende. Tin un director cu kier a duna mas atencion na e derecho di preso y personal. E atencion na e personal esaki no a logra.

Tin observacion caminda esnan cu ta bin pa bira director nunca antes a traha den un prizon. E hendenan cu nos tin den prizon tin hopi cualidad. Asina mes mester di un hende di pafo. Nos tin un prizon cu nunca antes a wordo maneha bon.

E conexcion cu e prizonnan Hulandes ta hopi bon pero asina mes no ta keda uno continuo. Sr. Dowers a splica cu e relacion estableci den nos region y Hulanda mester t'ey pa sostene e maneho. E

reto pa maneha prizon no ta facil.

Sr. Dowers a sigui splica cu a atende cu e maneho di e team di maneho Management team nan ta reduci e efecto di poder di un director cual no ta regla sinembargo ta bayendo Staten cu esaki. Sinembargo sr. Dowers no kier a bisa mucho mas riba esaki cual ta un decision cu lo mester cay awe mainta.

Motibo director a retira

Mientras cu ta conoci cu despues di e reunion sra. Hassel a laga su funcion como directora, el a bisa cu esaki el a haci despues cu a discuti riba ultimo desaroyonan den e institucion y entre otro kehonan cu a wordo treci dilanti. El a bisa cu e no por sigui traha bou di e condicionnan cu a wordo stipula den dicho reunion. El a finalisa bisando cu henter su carera el a cana stret y ta un hende integro, cual ta meta cu e tin pa KIA, pues tanten cu e tin impresion cu e no por logra e meta aki e no ta bay bek. □